

d Fasnachtsvärse 08 vo de Zibelegringe



Di neu Bundesrätin sött e schöneri Friise ha;
si fragt drum bir Kollegin Micheline a.
Die seit: d Francine Jordi, d Merkel und i,
mir alli göh zum Coifför Dimitri.

Är chunnt im Zug vo Züri, hätt i d Insel sölle;
bim Bahnhof hett er über die Boustell wölle,
louft u suecht, u wüll er e ke Usgang findt,
isch er allwäg hütt no i däm Labyrinth –

Die Därm vo Brasilie göh schynts uus:
Es Cervelat-Grounding, das wär e Gruus!
Verzwyflet sueche d Metzger anderi Hülle:
Tüet doch die Würst i Pariser fülle!

Der Yachtclub vo Gstaad hett ändlech o,
dank Bertarelli, en ächte Säglar übercho.
Die nächsti Regatte, dir wärdet s gseh,
macht me sicher uf em Louenese!

Gassechuchi, Alkistübli, Fixerruum, wohii?
O d Notschlafstell sött chly grösser sy.
Jetz wird all das zäme gfasst ar glyche Stell,
zentral, im lääre Schwyzerhof-Hotel...

"Freude herrscht" im Bärner Ogi-Land,
e Porta Alpina chunnt jetz doch no z Stand:
im NEAT-Lötschbärgloch als Touriste-Gäg,
e Bahnstation, mit eme Lift uf Kanderstäg!

Nach em Gheimplan vo de Gmeindrät Hügli u Ritz,
wott me jetze Poller, wo ufe chöme wi der Blitz.
Dermit tuet me der Bahnhofplatz bestücke:
zum d Alkis u d Bättler ewägg-spicke!

Mit 10'000 Tschugger, Militär u ganz viel Gäld,
wird Bärn zum Nabel vo der Wält.
Üsi Promis übertriebe, rede vo Sensation -
u das wäg 3 Euro-Mätschli im Wankdorfstadion?

Säg Täll, was hesch itz mit em Gessler gmacht?
Ha ne im heisse Chäs ersäuft, letscht Nacht!
Warum nid mit der Armbrust füsiliert?
Die isch im Züghuus z Altdorf deponiert...

Überall gsehsch itz Roucher vor de Türe.
Das git Grippe, wüll si früüre.
Drum 10 Stutz für Zigi - mit dene Stüüre
cha me d Kasse fülle, u vor de Beize füüre.

Der Sarkozy cha nume dank Sponsore
so ir Wält desume-jette wie ne More.
Uf em Basar hett är irgendwo,
o syni Bruni übercho...

Mit dere Foti macht me gar ke Staat:
Suech der Bundesrat im Proletariat!
Dänk es Vexierbild, mit em Turm vo Martigny?
Nei, es isch der Pascal, mit de chlyne Walterli.

Das sy no tolli Zyte gsi bim FC Thun:
Ir Champions League, viel Gäld u Ruhm!
Jetz sy si niene meh, abgestürzt voll u ganz,
ir Tabälle u bi de Fans..., am Schwanz.

Als neu Presidäntin wott d Hillary Clinton
gly wieder i z Wysse Hus z Washington.
Der Billy, dä erwartets no fasch meh,
sys gliebte Oral Office wieder z gseh...

Es Piste-Radar hett mi bblitzt im Schuss,
en Alkoholtest mit Kafi Luz intus,
u no ne Buess wägem Uriniere näb der Piste:
E tüüre Skitag, mit dene Schnee-Poliziste!

D Tenniskarriere vor Hingis liegt i Schärbe,
doch si möcht wyter für Wöschmaschine wärbe.
Dermit gits e wyssi Weste ganz bestimmt?
Ja, aber nume, we si z rächte Pulver nimmt!

Wie der Ospel mit syre Bank, möcht o der Merz,
d Schuld vom Bund saniere, ohni Schmäz.
Ame ryche Scheich verchouft me z Bundeshus,
u üsi Bundesrät wandere i d Wüesti us.

Muess nid schaffe, han e Wohnig u Gäld,
z Sozialamt sorgt, dass es mir a Nütem fählt.
U doch plaget mi öppis gäng wi meh:
z Bänzin wird ständig tüürer für my BMW...

Dog-Dance isch der neuschti Hit,
ou d Hünd vor Frou Szakacs mache mit.
Das isch e seriösi Sach, u nid zum Lache:
ou üse Stapi lehrt si wädle u Männndli mache.

Der Bronco-Jimy wetti Stapi wärde,
ou für d Hayoz wär das Höchst' uf Ärde.
Es schwierigs Renne, hei mir z Gfüehl,
gäg die zwe Töffler uf ihrne heisse Stüehli.

En Esel möchti mit em Zottel gärn emal,
ga tanze uf däm Ysfäld vor em Palais fédéral.
Pass uf, so uf em Glattys, hett der Zottel gseit,
isch eine wie Du, grad wüest uf d Schnurre gheit!